

氏族典第二百四十卷

張姓部列傳八

唐三 張宿

按唐書張宿傳宿本寒人自名諸生憲宗爲廣陵王時因張茂宗薦尉得出入邸中誕謔敢言及監撫自布衣授左拾遺交通權幸四方賂遺滿門數召對不能慎密坐漏禁中語貶郴丞十餘年累遷比部員外郎宰相李逢吉數言其狡譎不可信白爲濠州刺史宿上疏自言留不遣帝欲以爲諫議大夫逢吉曰諫議職要重當待賢者宿細人不可使汙是官陛下必用之請先去臣乃可帝不悅後逢吉罷詔權知諫議大夫宰相崔羣王涯同請曰諫議大夫前世或自山林擢行伍任之者然皆道義卓異於時今宿望輕若待以不次未足以寵適以累之也請授他官不聽使中人宣授焉宿怨執政不與己乃日肆讒慝與皇甫鏘相附離多中傷正人君子元和末持節至淄青李師道願割地遣子入侍旣而悔復遣宿往暴卒于道贈祕書監

張籍

按唐書張籍傳籍字文昌和州烏江人第進士爲太常寺太祝久次遷祕書郎韓愈薦爲國子博士歷水部員外郎主客郎中當時有名士皆與游而愈賢重之籍性狷直嘗責愈喜博筭及爲駮雜之說論議好勝人其排釋老不能著書若孟軻揚雄以垂世者籍爲詩長於樂府多警句仕終國子司業

張弘靖

按唐書張嘉貞傳嘉貞子延賞延賞子弘靖字元理雅厚信直以蔭爲河南叅軍裴延齡爲德陽公主治第欲徙弘靖先廟上疏自言德宗異之擢監察御史累遷戶部侍郎徙河中節度使元和中拜刑部尙書同中書門下平章事封高平縣侯武元衡遇害賊未得王承宗邸廝卒張晏被告詔付御史臺劾驗有狀弘靖疑御史傳致晏罪言之帝不聽遂誅晏并討承宗弘靖曰不如悉力淮西議再迂乃歸政爲河東節度使旣王師無功帝憶曩言下詔褒美弘靖亦遣使間道喻承宗承宗欸附召拜吏部尙書徙節宣武長慶初劉總舉所部內屬請弘靖爲代充盧龍節度使弘靖旬一決事賓客將吏罕聞其言委成于參佐韋雍張宗厚又不通大體其詬責士嘗曰天下無事而輩挽兩石弓不

如識一丁字軍中以氣自任銜之會雍欲鞭小將薊人未嘗更笞辱不伏弘靖繫之是夕軍亂囚弘靖取朱克融主留後詔貶弘靖太子賓客分司東都再貶吉州刺史明年改撫州刺史稍遷太子少師卒

張伾

按唐書張伾傳伾本爲澤潞將守臨洛田悅攻之乘城固守累月士死糧且盡救不至伾悉召部將立軍門命女出徧拜因曰諸君戰良苦吾無資爲賞願以是女賣直爲衆士一日費士皆哭曰請死戰會馬燧自河東將兵擊悅城下敗之伾乘勝出戰無不一當百以功遷泗州刺史居州十年擢右金吾衛大將軍未拜卒軍中議立其子重政母徐及兄號訴不肯從奔告淮南節度使王鐸乃免詔嘉其忠起爲金吾衛大將軍封徐魯國夫人

張茂和

按唐書張孝忠傳孝忠子茂和歷左武衛將軍裴度討蔡奏爲都押衙茂和數以膽勇求自試謂度無功辭不行度請斬之以令軍憲宗曰予以其家忠且孝爲卿遠斥後終諸衛將軍

張煦

按唐書張守珪傳守珪子獻誠獻誠從弟獻恭獻恭子煦積閔至夏州節度使元和八年振武軍逐節度使李進賢屠其家憲宗怒詔煦以本軍進討許以便宜賜緡三萬爲軍資煦入捕亂卒蘇國珍等數百人誅之卒贈太子太保

張茂昭

按唐書張孝忠傳孝忠子茂昭本名昇雲德宗時賜今名字豐明少沉毅頗通書傳孝忠時累擢檢校工部尚書孝忠卒帝拜邕王諒爲義武軍節度大使以茂昭爲留後封延德郡王後二年爲節度使久之入朝爲帝從容言河朔事帝竦聽曰恨見卿晚詔其子克禮尚晉康郡主方倚之經置北方會崩故茂昭每入臨輒哀不自勝順宗立進同中書門下平章事復遣之鎮賜女樂二人固辭憲宗元和二年加兼太子太保王承宗叛以騎二萬踰木刀溝與王師薄戰茂昭躬擐甲爲前鋒令其子克讓與諸軍分左右翼繞賊大敗之會有詔班師加檢校太尉兼太子太傅乃請舉宗還朝先敕妻子上道戒曰吾使而曹出易庶後世不爲汙俗所染未半道迎拜兼中書令至京師又表遷墳墓于

京兆許之明年疽發于首卒年五十諡曰獻武少子克勤開成中歷左武衛大將軍有詔賜一子五品官克勤以息幼推與其甥吏部員外郎裴夷直劾曰克勤胤有司法引庇它族開後日賣爵之端不可許遂著于令

張蕭遠

按全唐詩小傳蕭遠元和進士登第籍之弟也

張賈

按全唐詩小傳賈弘靖之從姪官至兵部尚書

張仲素

按全唐詩小傳仲素字繪之河間人憲宗時爲翰林學士後終中書舍人

張渾

按全唐詩小傳渾清河人永州刺史

張復

古今圖書集成
按全唐詩小傳復元和中人

張勝之

按全唐詩小傳勝之元和中人

張光朝

按全唐詩小傳朝光元和時人

張文規

按唐書張嘉貞傳嘉貞子延賞延賞子弘靖弘靖子文規裴度秉政引文規爲右補闕度出襄陽貶溫令度奏置幕府累轉吏部員外郎出爲安州刺史終桂管觀察使

張又新

按唐書張又新傳又新字孔昭工部侍郎薦之子元和中及進士高第歷左右補闕性傾邪李逢吉用事惡李紳冀得其罪又新與拾遺李續劉栖楚等爲逢吉搏呔所憎故有八關十六子之目敬宗立轉祠部員外郎及逢吉罷貶汀州刺史終左司郎中又新善文辭以諂附敗喪其家聲云

張阜

按唐書裴潏傳穆宗感方士有布衣張阜者上疏帝善其言詔訪阜不獲

張茂宗

按唐書張孝忠傳孝忠子茂宗累擢光祿少卿左衛將軍元和中歷閑廐使寶曆初遷兗海節度使終左龍武統軍

張彤

按全唐詩小傳彤長慶時人

張頂

按全唐詩小傳頂撫州人

張祐

按全唐詩小傳祐字承吉清河人以宮詞得名長慶中令狐楚表薦之不報辟諸侯府多不合自効去嘗客淮南愛丹陽曲阿地築室卜隱

張仲方

按唐書張九齡傳九齡曾孫仲方生而岐秀父友高郢見而異之曰是兒必爲國器使吾得位將振起之貞元中擢進士宏辭爲集賢校理母喪免會郢拜御史大夫表爲御史進累倉部員外郎呂溫劾李吉甫坐斥去仲方以溫黨補金州刺史入爲度支郎中吉甫卒太常諡恭懿博士尉遲汾請諡敬憲仲方挾怨上言吉甫名不配行憲宗疾其言貶爲遂州司馬稍進河南少尹鄭州刺史敬宗立爲諫議大夫太和初出爲福建觀察使召還進至左散騎常侍李德裕秉政以太子賓客分司東都德裕罷復拜常侍已出爲華州刺史召入授祕書監封曲江縣伯卒年七十二贈禮部尚書諡曰成

張次宗

按唐書張嘉貞傳嘉貞子弘靖弘靖子次宗開成初爲起居舍人以稱職兼集賢院直學士文規左遷改國子博士史館修撰李德裕再當國引爲考功員外郎知制誥出澄明二州刺史卒

張克勤

按唐書張孝忠傳孝忠子茂昭茂昭子克勤開成中歷左武衛大將軍

張元宗

按全唐詩小傳元宗太和時人

張希復

按全唐詩小傳希復字善繼常山人歷官集賢校理學士

張鷟

按全唐詩小傳鷟開成中人

張仲武

按唐書張仲武傳仲武范陽人通左氏春秋會昌初爲雄武軍使陳行泰殺史元忠宰相李德裕計河朔請帥皆報下太速故軍得以安若少須下且有變帝許之未報果爲張絳所殺復誘其軍以請亦置未報是時回鶻爲黠戛斯所破烏介可汗託天德塞上而仲武遣其屬吳仲舒入朝請以本軍擊回鶻德裕因問北方事仲舒曰行泰絳皆游客人心不附仲武舊將張光朝子年五十餘通書習

戎事性忠義願歸款朝廷舊矣德裕曰卽以爲帥軍得無復亂乎答曰仲武得士心受命必有逐絳者德裕入白帝曰行泰等邀節不可許仲武求自效用之有名軍且無辭乃擢兵馬留後而詔撫王領節度詔下絳果爲軍中所逐卽拜仲武副大使檢校工部尙書蘭陵郡公會回鶻特勒那頡頏擁赤心部七千帳逼漁陽仲武使其弟仲至與別將游奉實等率銳兵三萬破之獲馬牛橐駝旗纛不勝計遣吏獻狀進檢校兵部尙書始回鶻常有酋長監奚契丹以督歲貢因訶刺中國仲武使裨將石公緒等厚結二部執諜者八百餘人殺之回鶻欲入五原掠保塞雜虜乃先以宣門將軍四十七人詭好結歡仲武賂其下盡得所謀因逗留不遣使失師期回鶻人馬多病死者由是不敢犯五原塞烏介失勢往依康居盡徙餘種寄黑車子部回鶻遂衰名王貴種相繼降捕幾千人仲武表請立石以紀聖功帝詔德裕爲銘揭碑盧龍以告後世大中初又破奚北部及山奚俘獲雜畜不貲累擢檢校司徒同中書門下平章事卒諡曰莊

張道符

按全唐詩小傳道符字夢錫會昌三年進士第

張良器

按全唐詩小傳良器會昌進士第

張固

按全唐詩小傳固大中時嘗爲桂管觀察使

張賁

按全唐詩小傳賁字潤卿南陽人登大中進士第唐末爲廣文博士嘗隱於茅山後寓吳中與皮陸遊

張直方

按唐書張仲武傳仲武子直方以右金吾將軍襲節度留後俄進副大使舉動多不法畏下變起乃託出畋奔京師軍中以張允伸總後務直方至宣宗遣使者郊勞授金吾大將軍以其族大給檢校工部尚書俸久之進檢校尚書右僕射性暴率坐以小罪笞殺金吾史改右羽林統軍好馳獵往往設置罟於當道宿衛不時入下遷驍衛將軍奴婢細過輒殺積其罪貶思州司戶叅軍母驚曰尙有

尊于我子邪久乃復授羽林統軍縱部下爲盜復貶康州司馬後居東都弋獵愈甚洛陽飛鳥皆識之見必羣噪乾符中累進左驍衛大將軍時鄭畋輔政頗言仲武會昌時功第一今直方百口不自存每內燕以敝惡辭不赴陛下錄功念舊宜少優假詔還檢校右僕射進左金吾衛大將軍黃巢犯京師直方迎灞上旣而納厶命謀劫巢報天子公卿多依之賊覺屠其族

張允伸

子簡會

按唐書張允伸傳允伸字逢昌范陽人世爲軍校直方出奔以都知兵馬使爲衆立爲留後天子報可未幾檢校散騎常侍爲節度使累進檢校司徒兼太傅同中書門下平章事封燕國公龐勛以徐州反上米五十萬斛鹽二萬斛佐用度詔嘉美進兼侍中咸通十二年卒諡曰忠烈允伸性勤儉下所安賴未嘗有邊鄙虞子十四人簡會入朝兄弟多至大將軍刺史郡佐者

張保臯

按杜牧張保臯傳新羅人張保臯鄭年者來爲徐州小將保臯年三十年少十歲兄呼保臯俱善鬪戰騎而揮槍無有敵者年復能沒海五十里不噎保臯差不及常不相下後保臯歸謁其王得鎮清

海年失職饑寒欲歸乞食於保臯戍將曰奈何去取死年曰饑寒死不如兵死快遂去謁保臯保臯飲之極歡飲未卒其國使至大臣殺其王國亂無主保臯遂分兵五千人與年至國誅反者立王以報王遂徵保臯以爲相以年代保臯

張芬

按酉陽雜俎張芬曾爲韋南康親隨行軍曲藝過人力舉七尺碑定雙輪水碓常於福感寺趺鞠高及半塔

張叢

按全唐詩小傳叢咸通中官桂管觀察使

張演

按全唐詩小傳演咸通十三年及第

張孜

按全唐詩小傳孜京兆人耽酒如狂與李山甫善

古今圖書集成
張喬

按全唐詩小傳喬池州人咸通中進士黃巢之亂罷舉隱九華

張鵬

按萬姓統譜鵬德興人宣宗時爲河東節度掌書記吐蕃犯邊鵬率數千騎敗之懿宗立表爲瓊管五州招討使入爲金吾羽林二將軍屬蠻人渡瀘出爲邕州刺史制置使

張公素

按唐書張允伸傳允伸卒軍中推張公素爲留後公素范陽人以列將事允伸累擢平州刺史允伸卒以兵來會喪軍士素附其威望簡會知不可制卽出奔詔公素爲節度使進同中書門下平章事性暴厲眸子多白燕人號白眼相公爲李茂勳所襲奔京師貶復州司戶叅軍

張彥遠

按唐書張嘉貞傳嘉貞子延賞延賞子弘靖弘靖子文規文規子彥遠博學有文辭乾符中至大理卿

張讀

按唐書張薦傳薦孫讀字聖用幼穎解大中時第進士鄭薰辟署宣州幕府累遷禮部侍郎中和初爲吏部選牒精允調者丐留二年詔可榜其事曹門後兼弘文館學士判院事卒

張禕

按全唐詩小傳禕字冠章南陽人官中書舍人從僖宗幸蜀終兵部尙書

張雄

按唐書張雄傳雄泗州漣水人與里人馮弘鐸皆爲武寧軍偏將弘鐸爲吏辱雄爲辯數并見疑於節度使時溥二人懼禍乃合兵三百度江壁白下取蘇州據之自號天成軍鎮海節度使周寶奔常州聞高駢將徐約兵銳甚誘使擊雄雄匿衆海中使別將趙暉據上元寶兵散多降暉雄卽以上元爲西州旌旗衣服僭王者楊行密圍揚州畢師鐸厚齎寶幣啗雄雄率軍浮海屯東塘是時揚州圍久皮囊革帶食無餘軍中殺人代糧纔千錢聞雄至間道挾珍走軍以銀二斤易斗米逮糠粃以差爲直雄軍富過所欲卽不戰去暉數剽江道雄擊殺之坑其衆自屯上元大順初以上元爲昇州詔

授雄刺史未幾卒雄善馭衆人思之爲立廟弘鐸代爲刺史

張濬

按唐書張濬傳濬字禹川本河間人性通脫無檢汎知書史喜高論士友擯薄之不得志乃羸服屏居金鳳山學縱橫術以裨闔千時楊復恭薦爲太常博士進度支員外郎黃巢之亂僖宗西出衛士食不給漢陰令李康獻糗餌數百駄帝異之曰爾乃及是乎對曰張濬教臣也乃急召濬進諫議大夫宰相王鐸任行營都統奏署都統判官時王敬武在平盧濬往說之敬武卽引軍西擢濬爲會軍使賊平以戶部侍郎判度支後再狩山南拜同中書門下平章事昭宗卽位嘗問致治之要對曰在彊兵兵彊天下服矣天子繇是甘心於武功朱全忠上言先帝幸梁繇李克用請舉兵誅之濬請因其弱討之斷兩雄勢帝乃詔濬爲河東行營兵馬招討制置使次陰地關太原將李存孝擊之大北濬斂衆夜遁克用上書請罪朝廷震動卽日罷濬爲武昌軍節度使三貶繡州司戶叅軍全忠爲申請詔聽使便及濬將復用克用上言若朝以濬爲相暮請以兵見乃止乾寧中拜尙書右僕射上疏乞骸骨遷左僕射致仕居洛長水墅全忠脅帝東遷畏濬構他鎮兵使盜夜殺之屠其家百餘人